

ԺԽՏՈՂԱԿԱՆՈՒԹԵԱՆ ԴՐՍԵԽՈՐՈՒՄՆԵՐՆ ԱԼԵՔՍԱՆԴՐԱՊՈԼԻ ԳԱԻԱՌՈՒՄ 1918-1921՝ ԹՈՒՐՔԱԿԱՆ ՌԱԶՄԱԿԱԼՈՒՄՆԵՐԻ ՇՐՋԱՆՈՒՄ


ԿԱՐԻՆԷ ԱԼԵՔՍԱՆԵԱՆ

karineal@mail.ru

ՄՈՒՏՔ

Թուրքիայի արդի արտաքին քաղաքականության առանցքը համարուող ժխտողականությունը մինչև Հայոց Մեծ Եղեռնի տարիները ձգուող խոր արմատներ ունի¹:

Թէեւ միջազգային գիտական շրջանակներում ժխտողականությունը ընկալում է որպէս ցեղասպանության վերջնափուլ, երբ ազգի ոչնչացումից յետոյ արմատախիլ են արւում ազգի մշակոյթը եւ պատմական յիշողութիւնը², Թուրքիայում այն դրսեւորւել է ցեղասպանության իրականացման հետ միաժամանակ: Թուրք պետա-կան գործիչները, գիտակցելով հայ ժողովրդի եւ մարդկութեան դէմ իրա-կանացուելիք հրեշաւոր արարքի յանցաւորութիւնը, նախապէս քայլեր են ձեռնարկել յետագայում պատասխանատուութիւնից խուսափելու համար:



Մի ամբողջ ժողովրդի հայրենագրկելու եւ ոչնչացնելու հրեշաւոր արաքի համար հատուցման ժամը յետաձգելու յոյսով, թուրքերն այսօր եւա շարունակում են կառչել ժխտողականութեան արմատներից՝ կենսունակ դարձնելով դրանք նոր ժամանակակից մեթոդներով³:

Թուրքական ժխտողականութեան արմատները տարածուել են նաեւ Արեւելեան Հայաստանում, որտեղ Առաջին Համաշխարհային Պատերազմի աւարտական փուլում շարունակուող հայոց ցեղասպանութեան քաղաքականութիւնը թուրքական իշխանութիւնները իրականացրել են աւելի զգուշ եւ խորամանկ քայլերով: Թուրք ռճրագործները, 1918-1921թթ. ընթացքում երկու անգամ վեցական ամսով ռազմակալելով Ալեքսանդրապոլի Գաւառը, իրենց դիւանագիտական գի- նանոցի պաշարները հարստացնելով մարդակերութեան նոր մեթոդներով յօշոտել են եղեռնից վերապրած արեւմտահայութեանը, ինչպէս նաեւ

արեւելահայութեան մի ստուար զանգուած, թալանել եւ տնտեսապէս քայքայել Ալեքսանդրապոլի Գաւառը, ձեռնարկել ամէն քայլ իրենց հարեանութեամբ առաջացած հայկական նորանկախ պետութեանը զրկելու կենսունակ պետութիւն դառնալու հնարատրութիւնից⁴:

Արեւելեան Հայաստանում իրականացուող հայոց ցեղասպանութեան քաղաքականութեան հիմքում դնելով այնպիսի մի ռազմավարութիւն, որը միայն 1960ականներին միջազգային հանրութեան բառապաշարում պէտք է յայտնի դառնար ժխտողականութիւն անուանումով⁵, թուրք ջարդարարները ջանացել են ոչ միայն տուեալ ժամանակաշրջանում, այլ յետագայում եւս ապահովել իրենց միջազգային հանրութեան կարծիքից եւ հատուցումից: Յամենայնդէպս մինչ այսօր միջազգային հանրութեան կողմից դեռ չեն արժարժուում Արեւելեան Հայաստանում թուրքերի կատարած ցեղասպանութեան եւ դրա հետեւանքների մասին հարցերը:

Ընդ որում ոչ միայն միջազգային հանրութիւնը, այլ նաեւ հայ հասարակութիւնը ցեղասպանութիւնից 100 տարի անց դժուարանում է ընկալել Ալեքսանդրապոլի Գաւառում թուրքական ժխտողականութեան դրսեւորումները՝ յաճախ տուրք տալով ժխտողականութեան տարածուած մեթոդներց մէկին՝ զոհին մեղադրելուն: Հայ պատմագիտական մտքի եւ հասարակական գիտակցութեան մէջ առկայ են ոչ այնքան Արեւելեան Հայաստանում թուրքական ժխտողականութեան դրսեւորումների եւ Ալեքսանդրապոլի Գաւառի բնակչութեան ապրած ողբերգութեան բացայայտման, որքան նրանց մեղադրելու միտումները: Աւելին, նշուած ժամանակաշրջանում Ալեքսանդրապոլի Գաւառում տեղի ունեցած իրադարձութիւնների մասին կարծիքները ինչպէս պատմագիտութեան, այնպէս էլ հասարակական գիտակցութեան մէջ վերածուել են կարծրատիպերի: Մասնատրապէս Ալեքսանդրապոլի Գաւառի բնակչութիւնը մեղադրում է թուրքերին չդիմադրելու եւ նրանց հետ համագործակցելու համար: Մինչդեռ 1918-1921՝ Ալեքսանդրապոլի Գաւառի թուրքական զինակալման շրջանում թուրք-հայկական յարաբերութիւնների հիմքում ընկած էր թուրքական պետականօրէն մշակուած ցեղասպանութեան քաղաքականութեանը դիմակայող հայ բնակչութեան պայքարն իր ֆիզիկական գոյութեան համար⁶:

Թուրքական ժխտողականութեան ռազմավարութիւնը գրեթէ նոյնութեամբ կիրառուել է ինչպէս 1918, այնպէս էլ 1920՝ թուրքական արշաւանքների ժամանակ: Այսպէս թէ՛ 1918 եւ թէ՛ 1920ին թուրքերը իրենց առաջխաղացումն Արեւելեան Հայաստանում պայմանատրել են դաշնակից պետութիւնների՝ նախ Գերմանիայի, ապա եւ Խորհրդային Ռուսաստանի շահերով: Երկու դէպքում էլ հանդէս են եկել հայերի շահերի պաշտպանութեամբ՝ միաժամանակ մեղադրելով նրանց իրենց առաջխաղացման համար:

1918ին՝ Առաջին Համաշխարհային Պատերազմի աւարտական փուլում Արեւելեան Հայաստանում իրականացուող ռազմարշան իրենց դաշնակից Գերմանիայի շահերին համապատասխանեցնելու եւ զաւթողական նպատակները քօղարկելու համար, այն ներկայացում է իբր թէ հնարաւորութիւն՝ Ալեքսանդրապոլ-Ջուլֆա երկաթուղով թուրքական զօրքերը Պարսկաստան տեղափոխելու եւ Թաւրիզը հնարաւորինս շուտ անգլիացիներից գրաւելու համար⁷: Հայաստանի համար կենսական նշանակութիւն ունեցող երկաթուղու գրաւման այս հրեշաւոր ծրագրի իրականացումը, որը փաստօրէն մահ էր բերում հայերին, ներկայացում է ոչ միայն Գերմանիայի, այլ, որքան էլ տարօրինակ կարող է թուալ զոհերի՝ հայերի շահերից բխող գործողութիւն⁸:

Մայիսի 13ին թուրքական պատուիրակութեան նախագահ Խալիլ բէյը եւ Կովկասեան ճակատի հրամանատար Վեհիբ փաշան, հանդիպելով Անդրկովկասի պատուիրակութեան հայ անդամներ Ալեքսանդր Խատիսեանի եւ Յովհաննէս Քաջազնունու հետ նրանց համոզում են, որ առանց դիմադրութեան ամբողջ երկաթուղու յանձնումը բխում է հայերի շահերից, քանի որ քաղաքների ու գիւղերի միջոցով թուրքերի անցումը վտանգաւոր կը լինի նրանց համար, իսկ երկաթուղով անցումը՝ ապահով⁹: Թուրքական ժխտողական ռազմավարութեան կարեւոր դրսեւորումներց էր զօրքի եւ բնակչութեան դիմադրական կարողութիւնների եւ զգօնութեան թուլացումը: Այսպէս, 1918 Ապրիլին Կարսը գրաւելուց յետոյ ամբողջ 20 օր նրանք ոչ միայն ոչ մի թշմական գործողութիւն չեն կատարում՝ ստեղծելով այնպիսի տպաւորութիւն, որ առաջխաղացման որեւէ մտադրութիւն չունեն, այլ յաճախակի «բարեկամական» այցելութիւններ են կատարում Ալեքսանդրապոլ՝ ուղարկելով սպայական փոքր խմբեր, որոնք իհարկէ զբաղւում էին լրտեսութեամբ¹⁰: Իսկ Ալեքսանդրապոլը գրաւելու գործողութիւնը կարելի է համարել թուրքական ժխտողականութեան ռազմավարութեան դասական օրինակ: Բնակչութեան եւ զօրքի զգօնութիւնը թուլացնելուց յետոյ, Մայիսի 15ին Ալեքսանդրապոլ-Ջուլֆա երկաթգծի յանձնման պահանջը վերջնագրի տեսքով եւ պարսկերէնով փակ ծրարը, որ հնարաւոր չլինէր այն կարդալ, թուրքերն ուղարկում են Ալեքսանդրապոլի բերդի պարէտ Եանկովսկուն: Փաստօրէն, խաղից դուրս թողնելով իրենց դաշնակից Գերմանիային եւ Անդրկովկասի կառավարութեանը, թուրքերը վերջնագիր են ներկայացնում Ալեքսանդրապոլի գինուորական իշխանութիւններին: Վերջիններս, ուղղակիօրէն յայտնուելով թուրքական դիւանագիտութեան սարդոստայնում եւ չկարողանալով ճիշտ կողմնորոշուել ստեղծուած իրավիճակում, բնակչութեանը թողնում են անպաշտպան թուրքական վտանգի դէմ: Բերդի պարէտը անձամբ գնում է թուրքերի մօտ պարզելու նամակի բովանդակութիւնը, վերջիններս տեսնելով, որ բերդը մնացել է առանց հրամանատարի, անմիջապէս սկսում են ռմբակոծել քաղաքը եւ

տարբեր ուղղութիւններով յարձակման անցնում¹¹: Յանկարծակի եկած հայոց զօրքն այնուամենայնիւ որոշ հատուածներում հերոսաբար կռուում է: Ժամը մէկին վերադառնում է Եանկովսկին՝ բերելով գրութեան թարգմանութիւնը: Օղակման մէջ ընկած եւ յուսահատական դիմադրութիւն ցոյց տուող հայկական առանձին զօրամասերի դիմադրութիւնը կտրած լինելու նպատակով, թուրքերը գնդապետ Եանկեւսկուն ողորմաճաբար խոստանում են նաեւ չորս ժամով մինչեւ երեկոյեան հինգը դադարեցնել կրակն ու յարձակումը: Այդ կարճատեւ զինադադարը բոլորովին քայքայում եւ կազմալուծում է այս ու այն հատուածում կռուողների շարքերը՝ փախուստ-նահանջի հնարատրութիւն ստեղծելով նրանց, թուրքերի համար ապահովելով Վեհիբ փաշայի սպառնացող «շքերթը»¹²: Այդ ընթացքում թուրքական անակնկալ յարձակումից անօրինակ խուճապի մատնուած բնակչութիւնը բոլոր հնարատր ուղիներով փախչում է քաղաքից՝ իր հետ տանելով նաեւ իրենց ընտանիքներին միացած զինուորներին: Ընդ որում քաղաքից հեռանում են ոչ միայն այստեղ ապաստանած գաղթականների եւ տեղի բնակչութեան մեծ մասը, այլ նաեւ քաղաքային ինքնավարութեան ամբողջ կազմը. հասարակական, գաղթականական, բանկային, կօօպերատիւ, մթերային բոլոր կազմակերպութիւնները, ինչպէս նաեւ քաղաքային ամբողջ միլիցիան՝ իր շտաբով: Մի քանի ժամուայ ընթացքում ամբողջ քաղաքը դատարկում է, եւ մնացած ոչ մեծաքանակ բնակչութիւնը, բնակարանները, պահեստները, առետրական եւ այլ շէնքեր մնում են բախտի քմահաճոյքին: Դատարկում են նաեւ գաւառի գիւղերը¹³: Ռազմաճակատի եւ կայազօրի զօրքերը ետ են քշում ճակատից 20 վերստ հեռու¹⁴:

Թուրքերը մինչ այդ հոգ էին տարել Ալեքսանդրապոլը պաշտպանութիւնից զրկելու ուղութեամբ: Իրենց ռազմական առաջխաղացումը պայմանատրելով իբր թէ հայկական ուժերի կողմից մուսուլման բնակչութեան կոտորածներով, չէզոքացրել էին թուրքերի սարսափ համարուող Անդրանիկին եւ նրա զինուորներին: Պատերազմի մեղքը բարդելով Անդրանիկի վրայ, մի կողմից առաջացրել էին հայ բնակչութեան դժգոհութիւնը՝ զրկելով Անդրանիկին նրանց աջակցութիւնից, միւս կողմից՝ հայ քաղաքական գործիչներին դրդել մեկուսացնել Անդրանիկին ռազմական գործողութիւնների վայրերից: Հայոց ազգային խորհուրդը, ընդունելով թուրքական դիւանագիտութեան այս խայծը, ամէն ինչ արել էր, որպէսզի Անդրանիկի զօրամասն առանձնացուէր եւ թշնամու յարձակման գլխատր ուղղութիւնից մի կողմ գտնուող գծի վրայ ուղարկուէր: Պատահական չէ, որ Ապրիլի 13ին Նազարբեկեանը հրամայել էր Անդրանիկին իր ջոկատով պահպանել Ախալքալաքի եւ Ալեքսանդրապոլի հաղորդակցութիւնը եւ հսկողութիւն սահմանել Կարսի Մարզի վրայ¹⁵: Մայիսի 8ին Հայաստանի

Ապահովութեան Խորհրդի նախագահ Վահան Փափազեանը, Հայկական Հարուածող Առանձին Զօրամասի հրամանատար զօրավար Անդրանիկին ուղղուած պաշտօնական գրութեան մէջ, նրա ուժերի տեղաբաշխումը պատճառաբանել էր այն հանգամանքով, որ կովկասեան կառավարութիւնը ամէն զոհողութիւններով ջանում է որեւէ առիթ չտալ, որ թուրքական բանակը սահմանն անցնի: «Կը գտնենք,- նշուած էր այդ գրութեան մէջ,- որ գլխատրապէս թուրքահայ զօրամասերի եւ Ձեր ներկայութիւնը այնպէղ վերոյիշեալ տեսակէտից կարող է յարմար առիթ համարուել թուրքական բանակի կողմից եւ անցանկալի արդիւնք ունենալ թէ զինադադարի յարգման եւ թէ մանաւանդ թուրքահայերի շահերի տեսակէտից»¹⁶:

Փաստօրէն թուրք դիւանագէտները կարողանում են հասնել այն բանին, որ իր ամբողջ գիտակցական կեանքը թուրքերի դէմ կոտոր հերոսը հայութեան համար բախտորոշ պահին չկարողանար մասնակցել հայոց գոյամարտին: Աւելին, Անդրանիկը մի կերպ խոյս տուեց անխուսափելի ոչնչացումից: Ալեքսանդրապոլի յանձնուելուց յետոյ շուտ կողմնորոշուելու եւ արագ տեղաշարժուելու շնորհիւ միայն նա կարողացաւ փրկուել շրջափակումից եւ ոչնչացումից: Նա, գրեթէ բոլոր կողմերից շրջապատուած լինելով թուրքերով, եռօրեայ կռիւներով չէզոքացրեց թուրքերի կողմից պաշարման վտանգը եւ կորպուսի միւս զօրամասերի հետ կապ հաստատելու միակ ելքը տեսնելով դէպի երկաթգիծը շարժուելու մէջ, խուճապի մատնուած գաղթականութեան հետ միասին շարժուեց դէպի Զալալօղլի եւ երկու օրուայ կատաղի կռիւներից յետոյ հասաւ Դիլիջան: Այստեղ, իմանալով Բաթումի Պայմանագրի կնքման մասին, հեռացաւ Հայաստանի Հանրապետութեան սահմաններէից:

Պակաս դեր չունեցաւ թուրքական դիւանագիտութիւնը նաեւ Անդրանիկի Հայաստանից հեռանալու գործում: Բաթումի Պայմանագրում հայկական ջոկատները ցրելու հարցը բարձրացնելը եւս ժխտողականութեան ռազմավարութեան դրսեւորում էր: Փաստօրէն, իբր թէ Հայաստանում կարգ ու կանոն հաստատելու նպատակով պահանջում են վերացնել անօրինական զինուորական խմբերը, (բանդաները, ինչպէս պայմանագրում էր ամրագրուած), սակայն իրականում նորաստեղծ Հայաստանի Հանրապետութեանը զրկում Անդրանիկի պատերազմի բովով անցած կոտորողների պաշտպանութիւնից: (Երկու տարի անց՝ 1920ին Հայաստանը զգաց միայն դրա հետեանքները:) Հայաստանի իշխանութիւններին պարտադրելով կատարել Բաթումի Պայմանագրի կէտերը, միաժամանակ իրենք բոլոր միջոցներով խուսափում էին հայ զերիներին եւ գաղթականներին իրենց բնակութեան վայրերը վերադարձնելու նոյն պայմանագրով ամրագրուած պարտաւորութիւններից: Ալեքսանդրապոլում ՀՀ ներկայացուցիչ Գ. Խոյէցեանի՝ արտաքին գործերի նախարարին 1918 Սեպտեմբեր 8ին

ուղղած գրութիւնից երեւում է, որ գերիները ոչ միայն վերադարձուած չէին, այլ գտնուում էին սոսկալի պայմաններում¹⁷: Գաղթականները եւս երկար ժամանակ չէին կարող վերադառնալ իրենց բնակութեան վայրերը: Թուրքական ժխտողականութեան դրսեւորումներից էր նաեւ գաղթականներին իրենց բնակութեան վայրերը չթողնելը եւ գաղթը չխրախուսելը: Մի կողմից դիւանագիտական խարդաւանքներով եւ յանկարծակի յարձակումներով խուճապ առաջացնելով բնակչութեան մէջ, ստիպում էին վերջիններիս բռնել գաղթի ճանապարհը, միւս կողմից՝ իբր թէ չեն խրախուսում գաղթը, բնակչութեանը կոչ էին անում չգաղթել եւ չդիմադրել: Աւելին, դիմադրողներին դաժանօրէն պատժում էին, իսկ գաղթողներին՝ արգելում վերադառնալ իրենց բնակութեան վայրերը՝ մատնելով սովի եւ գրկանքների: Մեղադրելով գաղթականներին իբր թէ օսմանեան պետութեան դէմ յանցագործութիւններ կատարելու մէջ, (այլապէս ինչու պէտք է փախչէին իրենցից) գրկում էին նրանց սեփականութեան իրաւունքից եւ պետականացնում ունեցուածքը: Հատկանշական է, որ երբ Ալեքսանդրապոլից հեռանալուց յետոյ բնակչութիւնը Ղարաքիլիսայում, յայտնուելով անելանելի վիճակի մէջ, պատուիրակութիւն է ուղարկում թուրք փաշայի մօտ խնդրելով վերադառնալու հնարաւորութիւն տալ իրենց, վերջինս մերժում է, խոստանալով միայն երեք օր յետոյ թողնել¹⁸: Սակայն նրանք այդպէս էլ չեն կարողանում վերադառնալ, քանի որ Ղարաքիլիսայի ճակատամարտում նրանց մի մասը կոտորում է, իսկ մնացածները, որ մի կերպ հասնում են Թիֆլիս, երկար ժամանակ չէին կարող վերադառնալ, թէեւ Բաթումի Պայմանագրով նրանց այդ հնարաւորութիւնը տրուել էր¹⁹: Իսկ ինչ վերաբերում է Ալեքսանդրապոլի Գաւառում ապաստանած արեւմտահայ գաղթականներին, ապա կտրուկ արգելելով վերջիններիս վերադարձը, ոչնչացնում էին նրանց անխնայ, ինչպէս ուղղակի կոտորելով, այնպէս էլ սովի եւ թշուառութեան մատնելով²⁰:

Թուրքական ժխտողականութեան ռազմավարութեան իւրայատուկ դրսեւորումներից էր տեղական իշխանութեան մարմինների ստեղծումը եւ նրանց միջոցով իրենց գործողութիւններին օրինական տեսք տալը²¹: Փախստական դարձած հայ բնակչութեան անտէր մնացած հարստութիւններն օրինական կարգով թալանելու նպատակով Մայիսի 17ին թուրքերն այստեղ ստեղծում են տեղական իշխանութեան մարմիններ՝ քաղաքային խորհուրդ եւ վարչութիւն, որոնց միջոցով էին միայն շփում բնակչութեան հետ²²: 1918 Սեպտեմբերին միայն, երբ ակնյայտ էր Թուրքիայի պարտութիւնը Առաջին Համաշխարհային Պատերազմում, ՀՀ կառավարութեանը թոյլատրում է Ալեքսանդրապոլում ունենալ ներկայացուցչութիւն²³: Հայ բնակչութեանը մինչեւ վերջին հնարաւորութիւնը կոտորելու եւ թալանելու, եւ միաժամանակ բարիդրացիական յարաբերութիւններ հաստատելու, վիճակը մեղմելու,

բարեկամ ձեանալու թուրքական դիանագիտական քայլերն ուղղակի ապշեցնող են: Ալեքսանդրապոլի Գաառն ամբողջովին թալանելուց եւ բնակչութիւնէ կոտորելուց յետոյ, զգալով պատերազմում իրենց մօտալուտ պարտութիւնը եւ պատասխանատուութիւնից վախենալով, փորձում են հանդարտեցնել կրքերը, հաստատել բարիդրացիական յարաբերութիւններ թուրք պաշտօնեաների եւ հայ հասարակութեան միջեւ: Ինքը՝ Արեւելեան ռազմաբեմի զօրահրամանատար Հալիլ փաշան, ոչ միայն սիրալիր ընդունում է Ալեքսանդրապոլում ՀՀ արտագործնախարարութեան ներկայացուցիչ նշանակուած Խոյեցեանին, այլ նոյնիսկ փոխայցելութիւն է կատարում: «Հայերու վերաբերմամբ այնքան դաժան ու անողոր քաղաքականութիւնը հիմա մէկէն կը փոխուէր,- գրում է Խոյեցեանն ՀՀ արտաքին գործերի նախարարին ուղղուած զեկուցագրում,- եւ կը դառնար ջերմ, սիրալիր բարեկամութեան եւ ամէն ջանք գործ կը դրուէր օր առաջ հայերու հետ խնդիրը կարգադրել եւ «թեւանցուկ», ինչպէս իրենք կ'ըսէին, մտնել ընդհանուր ժողովասրահը»²⁴:

Հայոց պետականութեան ոչնչացումը թուրքական դիանագիտութեան հիմնական նպատակն էր: Բաթումի Պայմանագրով առաջինը ճանաչելով հայոց պետականութեան գոյութիւնը, թուրքերը միաժամանակ ջանքեր չխնայեցին այն ոչնչացնելու ուղղութեամբ: Եւ նոյնիսկ Անդրկովկասից իրենց հեռանալուց յետոյ, շարունակելով այդ քաղաքականութիւնը, միաժամանակ հայերին եւ վրացիներին առաջարկելով գրաւել իրենց կողմից դատարկուած տարածքները, հրահրեցին հայ-վրացական պատերազմ, որը ծանր հետեւանքեր ունեցաւ ՀՀ, յատկապէս թուրքական բռնազաւթման պայմաններում վեց ամիս գտնուած Ալեքսանդրապոլի Գաառնի տնտեսական կեանքի վրայ: Եւ, ընդհանրապէս, այն ինչ արեցին թուրքերն իրենց վեցամսեայ բռնազաւթման շրջանում, այլ որակում չունի քան ցեղասպանութիւն: Հայաստանի Հանրապետութիւնը, մասնաւորապէս Ալեքսանդրապոլի Գաառնը երկար ժամանակ զգում էր այդ քաղաքականութեան ծանր հետեւանքներ: Ահաւոր թալանը, երիտասարդութեան ոչնչացումը, հազարաւոր արեւմտահայ գաղթականների առկայութիւնը, ՀՀ կառավարութեանը հնարաւորութիւն չընձեռեցին յաղթահարել ծանր ընկերային-տնտեսական վիճակը: Չնայած բոլոր ճիգերին, յամենայն դէպս մինչեւ 1920ի թուրքական նոր արշաւանքը Ալեքսանդրապոլի Գաառնը գտնուում էր սովի ճիրաններում:

Ամերիկեան օգնութեամբ մի կերպ անխուսափելի կործանումից փրկուած Հայաստանը 1920ին յայտնուում է թուրքական սալի եւ ռուսական մուրճի արանքում: Աւելին, թուրքերի կողմից որակուելով արեւմտեան կայսերապաշտութեան դաշնակից՝ ենթարկում նոր ցեղասպանութեան, այս անգամ բոլշեւիկների դաշնակից քեմալականների կողմից: Իրենց նախորդների ժխտողական ռազմավարութիւնը շարունակող

քեմալականները, թուրքական շահերը յարմարեցնելով Խորհրդային Ռուսաստանի շահերին, ապահովում են իրենց առաջխաղացումը մինչև Սարիղամիշ- Շահթախթի գիծը: Նախիջեանի վրայով Կարմիր Բանակի հետ անմիջական կապ ստեղծելու պատրուակով, առանց որի, իբր թե քեմալականները մէկ ամիս էլ չեն դիմանայ, գրաւում են Սարիղամիշը, այնուհետեւ անակնկալ յարձակումով նաեւ Կարսը՝ փաստի առաջ կանգնեցնում բոլշեիկներին: Իսկ վերջիններիս դժգոհութիւններից խուսափելու համար, իրենց առաջխաղացումը պայմանաւորելով իբր ՀՀում խորհրդային իշխանութիւն հաստատելու հետ, հանդէս են գալիս ՀՀ խորհրդայնացման ջատագովներ: Թուրքերն, իհարկէ, այս անգամ եւս չեն մոռնում դա բխեցնել հայերի շահերից: Պարզում է, որ իրենց առաջխաղացումը անլի շատ պէտք էր հայերին, քանի որ վերջիններս ազատում էին «դաշնակացականների դարաւոր լծից», իսկ իրենք ընդամենը հնարաւորութիւն էին ստանում իշխանութիւնը յանձնել հայ ժողովրդի իրական կարիքները հոգացող կուսակցութեանը: «Անապոլիական կառավարութիւնը յարկապէս յուսով է,- ասուած էր Հոկտեմբերի 27ին Մոսկուայում ստացուած մի հեռագրում,- որ դաշնակների պարտութիւնը կը յանգեցնի նրան, որ հայ ժողովուրդը կը կանգնի իր շահերին համապատասխան խելացի ուղու վրայ եւ իշխանութեան գլուխ կը դնի ժամանակի հրապապ պահանջները հասկանալու ընդունակ եւ խորհրդային ու անապոլիական կառավարութիւնների միջեւ բարեկամական կապող օղակի դեր կատարող հայկական կառավարութիւն: Անապոլիական կառավարութիւնը հաւատում է, որ խորհրդային Ռուսաստանը առանց փափանջութեւի իր օգնութիւնն ու աջակցութիւնը ցոյց կը փայ այդ գործին, որը յուսալիօրէն կ'ապահովի ուղիղ կապը երկու բարեկամական ժողովուրդների միջեւ»²⁵: Իսկ Ալեքսանդրապոլի Գաւառի գրաման հարցում նրանք գերազանցեցին իրենք իրենց՝ նոր գոյներ անւազնելով թուրքական ժխտողականութեան ներկայանակի մէջ: Կարաբեքիրը, մի կողմից ռազմական առաջխաղացումը պայմանաւորելով Խորհրդային Ռուսաստանի շահերով, միւս կողմից՝ ՀՀ իշխանութիւնների հետ զինադադարի պայմանով գրաւում է Ալեքսանդրապոլի կարեւոր ռազմագիտական կէտերը՝ բերդն ու կայարանը:

Նոյեմբերի 5ին Կարաբեքիրը հայոց բանակի հրամանատարին յայտնում է, որ ինքը ստացել է հաշտութեան մասին ՀՀ կառավարութեան առաջարկը եւ հեռագրով հաղորդել Անկարա եւ խոստանում է պատասխանը հաղորդել: Իսկ մինչ պատասխանի ստանալը առաջարկում է նախնական զինադադար, պայմանով, որ հայերը ետ քաշեն զօրքը Արփաչայի արեւմտեան ափից ծախ, թուրքական զօրքերը գրաւեն Ալեքսանդրապոլի բերդը, երկաթուղային կայարանը եւ շուրջը 10 կմ շրջակայքով²⁶: Իսկ երբ, հայկական զօրքերը, կատարելով զինադադարի

պայմանները, սկսում են ետ քաշուել Արփաչայի արեւմտեան ափից, ինչպէս նաեւ դատարկել Ալեքսանդրապոլի դիրքերը եւ հաստատուել Զաջուռի ստորոտում գտնուող հայկական գիւղերում, Կարաբեքիրը կատարում է յաջորդ քայլը: Իր կողմից առաջարկած զինադադարով հայերին ստիպելով փաստօրէն առանց դիմադրութեան իրեն յանձնել Ալեքսանդրապոլը եւ զրկուել կարեւոր ռազմագիտական դիրքերից, Նոյեմբերի 8ի երեկոյեան հայկական կողմին առաջարկում է նոր, անլի ծանր զինադադարի պայմաններ իր կառավարութեան կողմից՝ նպատակ ունենալով մերժման դէպքում, զարգացնել ռազմական յաջողութիւնները եւ գրաւել Ալեքսանդրապոլի Գաւառը²⁷: Փաստօրէն Կարաբեքիրը ստիպում է ՀՀ իշխանութիւններին երկու զինադադար կնքել, մէկն իր եւ միւսն՝ իր կառավարութեան հետ: ՀՀ կառավարութիւնը յոյս ունենալով, որ ժողովուրդը կը դիմադրի, Նոյեմբերի 10ին մերժում է զինադադարի պահանջները, դրանով իսկ հնարաւորութիւն տալով թուրքերին առաջխաղալ եւ գրաւել Ալեքսանդրապոլի Գաւառը: Կարաբեքիրը, չսպասելով Անկարայի պատասխանին, իսկոյն պատասխան նոտա է յղում ՀՀ կառավարութեանը, որի մէջ ասում է, թէ իր եւ կառավարութեան պայմանները չպետք է շփոթել, եւ քանի որ ՀՀ կառավարութիւնը չի ընդունում իր կառավարութեան պայմանները, ուստի ինքը ստիպուած է վերսկսել ռազմական գործողութիւնները²⁸: Ակնյայտ է, որ ռազմագիտական կարեւոր դիրքերից զրկուած հայոց բանակը, նոյնիսկ լաւագոյն ցանկութեան դէպքում, չէր կարող կանգնեցնել թուրքերի առաջխաղացումը: Ալեքսանդրապոլի Գաւառը թուրքերի կողմից գրաւուելուց յետոյ միայն ՀՀ կառավարութիւնը Նոյեմբերին 18ին ստիպուած է լինում կնքել զինադադար²⁹:

Թուրքերն, իհարկէ, նախապէս հոգացել էին հայ բնակչութեան դիմադրական կարողութիւնները թուլացնելու, երկպառակութիւն գցելու մասին: Նոյեմբերի 6ի կնքած զինադադարով թուրք հրամանատարութիւնը երաշխաւորում էր, որ քաղաքում չի խանգարուի կարգ ու կանոնը, եւ ազգաբնակչութեան ապահովութիւնը³⁰: Նոյեմբերի 7ին, քաղաք մտնելով, Կարաբեքիրը նամակով դիմում է Ալեքսանդրապոլի բնակչութեանը, կոչելով հանգստութիւն պահպանել, հաւատացնելով, որ իրենք խաղաղ բնակչութեան նկատմամբ թշնամական տրամադրութիւն չունեն, այլ միայն դաշնակցականների, որոնք իբր թէ պատճառ են հանդիսացել իրենց առաջխաղացմանը: Նամակում առաջարկում է նաեւ դիմաւորել իրենց իբր ազատարարների³¹:

Ինչպէս 1918ին, այնպէս էլ 1920ին թուրքերը զանգուածային եւ բացայայտ կոտորածներ չեն իրականացնում այն վայրերում, որտեղ իրենց դիմաւորում էին եւ դիմադրութիւն ցոյց չէին տալիս: Եւ հակառակը՝ անխնայ կոտորում էին դիմադրութիւն ցոյց տուող վայրերի բնակչութեանը՝ այս կերպ թուլացնում բնակչութեան դիմադրական

կարողությունները, հակասություններ առաջացնում նրանց մեջ: Դիմադրություն ցուցաբերողները յաճախ մեղադրում էին բնակչության կողմից, իբր թե կոտորածներին առիթ տալու համար: Իսկ կոտորածներ թուրքերն, այնուամենայնիւ իրականացնում էին թաքուն, խաբէութեամբ եւ այլ միջոցներով: Դա, իհարկէ, նրանց չէր խանգարում շնորհակալական թերթիկներ պահանջել հայ բնակչութիւնից, իբր թէ իրենք նպաստել են կարգ ու կանոնի հաստատմանը *«տեղիք չտալով ոչ քայքայման, ոչ թալանի եւ ոչ էլ սպանութեան»*³²:

Թուրքերը, 1920-1921՝ ռազմակալուած Ալեքսանդրապոլի Գաւառում յաջողութեամբ զարգացնում են 1918ին կիրառած տեղական իշխանութեան մարմինների ստեղծման ռազմավարութիւնը: Թուրքական ռազմակալման ամբողջ շրջանում Ալեքսանդրապոլի Գաւառում ստեղծում են միքանի իշխանութիւններ, երբեմն դրանք հակադրելով միմեանց³³: Այսպէս, քաղաքային իշխանութիւնների կողմից քաղաքը լքելուց յետոյ, այստեղ Լեւոն Սարգսեանի գլխատրութեամբ ձեւաւորում է զանազան կուսակցութիւնների 15 ներկայացուցիչներից բաղկացած իշխանութեան մարմին, որն էլ ձեռնամուխ է լինում քաղաքի գործերի կարգաւորմանը³⁴: Ժողովրդական, Սոցիալ-Դեմոկրատ եւ Կոմունիստական կուսակցութիւնների ներկայացուցիչներից բաղկացած այս իշխանութեան մարմինն էլ հենց դիմաւորում է զինադադարով քաղաք մտած թուրքերին: Սակայն միքանի օրից գործնականօրէն ցոյց տալու համար իրենց խորհրդային իշխանութեան կողմնակիցներ, թուրքերն այստեղ հռչակում են խորհրդային կարգեր, ստեղծում իշխանութեան նոր մարմին՝ յեղկոմ³⁵: Յեղկոմի իշխանութիւնից հեռանալուց յետոյ, ստեղծում են հերթական իշխանութիւնը՝ Ս. Մատինեանի գլխատրութեամբ³⁶: Իսկ երբ վերջինս, օգտուելով թուրքերի թուլանալուց, փորձում է միանձնեայ կառավարել, թուրքերն Ալեքսանդրապոլում կեանքի են կոչում քաղաքային նոր ինքնավարութիւնը՝ ստեղծելով երկիշխանութիւն:

Թուրքական ժխտողականութեան իրատեսակ դրսեւորում էր Ալեքսանդրապոլի Գաւառում հինգ ամիս անօրինական մնալը:

1920ին Ալեքսանդրապոլի Պայմանագրի կնքումով թէւ գաւառը մնում էր ՀՀ կազմում, բայց թուրքերը ոչ մի իրաւական հիմք չունենալով, ամբողջ հինգ ամիս դուրս չեն գալիս այստեղից՝ շարունակելով մինչեւ վերջին հնարաւորութիւնը հայ բնակչութեանը թալանելու եւ կոտորելու քաղաքականութիւնը:

Այս անգամ արդէն հանդէս գալով խորհրդային իշխանութեան երաշխատոր՝ փորձում են Խորհրդային Ռուսաստանին համոզել, որ առանց իրենց հնարաւոր չէ ՀՀում խորհրդային իշխանութեան ամրապնդումը եւ Անդրկովկասի խորհրդայնացումը³⁷: Մասնաւորապէս, պնդելով, որ Հայաստանում խորհրդային իշխանութիւնը դեռ ամուր չէ, խորհրդային իշխանութիւններից պահանջում են դաժան վերաբերմունք՝

դաշնակցականների նկատմամբ: Վերջիններս, թեև Դեկտեմբերի 2ի հայրուսական համաձայնագրով պարտավորվել էին բռնություններ չիրականացնել նախկին իշխանությունների եւ կառավարող կուսակցության անդամների դեմ, դիմում են անօրինակ ճնշամիջոցների: Արդիւնքում թուրքերը ստանում են փետրուարեան ապստամբութիւնը: Դաշնակցական ղեկավարները այլ ելք չունենալով ստիպուած օգնութեան են դիմում թուրքերին կարծելով, թէ նրանց նպատակը խորհրդային իշխանութեան Հայաստանում տապալելն է:

Մասնատրապէս, 1921 Մարտի 1ին Թուրքիայի ազգային մեծ ժողովի կառավարութեան Արեւելեան ճակատի հրամանատարութեան ներկայացուցիչ Բեհաէդդինին ուղղած գրութեամբ Հայրենիքի Փրկութեան Կոմիտէի նախագահ Սիմոն Վրացեանը խնդրում էր թուրք բարձր ղեկավարութեանը փոխանցել իր խնդրանքը՝ ազատել հայ գերիներին եւ օգնել զէնքով, քանի որ ըստ իր համոզման «տաճիկ ժողովրդի կենսական շահն էլ պահանջում է Հայաստանի յաղթական դուրս գալն այս կուից եւ անկախ մնալը»³⁸:

Մինչդեռ թուրքերն օգտուելով իրենց կողմից ստեղծուած հնարաւորութիւնից, 1921 Մարտի 16ին Մոսկուայում կնքում են «Ռուս-Թուրքական Եղբայրութեան Եւ Բարեկամութեան Պայմանագիր»ը, բաժանելով Հայաստանն առանց հայերի մասնակցութեան: Թէեւ այս պայմանագրով թուրքերը պէտք է հեռանային Ալեքսանդրապոլի Գաւառից, բայց շարունակում են մնալ այստեղ՝ իբր Անդրկովկասում խորհրդային իշխանութեան հաստատման երաշխաւորներ: Եւ միայն Ապրիլին, երբ ակնյայտօրէն փորձում են գրաւել Բաքուն, Խորհրդային Ռուսաստանի կառավարութիւնը վերջնագրով պահանջում է նրանց հեռանալը:

Թուրքերը, թէև 1921 Ապրիլին հեռանում են Ալեքսանդրապոլի Գաւառից, բայց երկար ժամանակ, մինչեւ Կարսի Պայմանագրի կնքումը նոյն ժխտողական ռազմավարութեամբ շարունակում են թշնամական գործողութիւնները Խորհրդային Հայաստանի եւ հայ ժողովրդի նկատմամբ³⁹: Իսկ հեռանալիս չեն մոռանում բարեմաղթութիւններ անել «բարեկամ» հայ ժողովրդին՝ միաժամանակ սպառնալով, որ վախենան իրենց երրորդ գալուց՝ խոստանալով քարը քարին չթողնել Ալեքսանդրապոլում⁴⁰:

ԾԱՆՕԹԱԳՐՈՒԹԻՒՆՆԵՐ

¹ Լ. Գասպարեան, «Հայոց Յեղասպանութեան Ժխտման Փուլերը», 09, 2016 <http://repairfuture.net/index.php/hy/armenian-genocide-recognition-and-reparations-standpoint-of-armenia-armenian/the-stages-of-denial-of-the-armenian-genocide-in-turkey-armenian>

- ² Առաջին անգամ 1998ին Յեղասպանագետների Միջազգային Ընկերակցության նախագահ Գրեգորի Սթենթոնը տուեց Յեղասպանության ութ փուլի տեսությունը, եւ որպէս ցեղասպանության իրագործման վերջին փուլ՝ ամրագրուեց ժխտողականութիւնը: Մանրամասն տե՛ս՝ <http://www.genocidewatch.org/aboutgenocide/8stagesofgenocide.html> :
- ³ <http://armscoop.com/2012/01/>, Ա. Աւետիսեան, «Հայոց Յեղասպանության ժխտողական Քաղաքականութեան Մէջ Հասարակական Կարծիք Ձեւաւորողների Դերը Եւ Գործունէութեան Ժամանակակից Մեթոդները»:
- ⁴ Կ. Ալեքսանեան, «Թուրքիայի Յեղասպանութեան Քաղաքականութեան Շարունակութիւնն Ալեքսանդրապոլի Գաւառում», *Բանբեր Հայաստանի Արխիւների*, թիւ 1, 2005, էջ 18-25:
- ⁵ http://www.armin.am/images/menus/2472/Ruben_Melkonyan.pdf, «Հայոց Յեղասպանութեան Նկատմամբ Թուրքական Քաղաքականութեան Որոշ Առանձնայատկութիւնների Շուրջ (1965 եւ 2015):
- ⁶ Ալեքսանեան Կ., «Հայ-Թուրքական Յարաբերութիւնները Ալեքսանդրապոլի Գաւառի Թուրքական Ռազմակալման Շրջանում (1918-1921)», *Հայկազեան Հայագիտական Հանդէս*, Հտր. ԼԵ., Պէյրուք, 2015, էջ 293-326:
- ⁷ Յարութիւն Թուրքեան, *Սարդարապատի Հերոսամարտը*, Երեւան, Հայաստան Հրատ. 1969, էջ 121:
- ⁸ Հրանդ Աւետիսեան, *Հայկական Հարցը 1918թ.*, Երեւան, Բարձրագոյն Դպրոց Հրատ., 1997, էջ 197:
- ⁹ Աւետիսեան, էջ 197:
- ¹⁰ ՀԱԱ, ֆ.57, ց.5, գ.187, թ.1-41:
- ¹¹ ՀԱԱ, ֆ.370, ց.1, գ.5, թ.7-8:
- ¹² Աւետիսեան, էջ 197:
- ¹³ ՀԱԱ, ֆ.57, ց.5, գ.187, թթ.1-41:
- ¹⁴ ՀԱԱ, ֆ.105, ց.1, գ.2711, թթ.3-4:
- ¹⁵ ՀԱԱ. ֆ.370, ց.1,գ.1, թ. 14:
- ¹⁶ ՀԱԱ, ֆ.370, ց.1, գ.5, թ.4:
- ¹⁷ ՀԱԱ, ֆ.200, ց.1, գ.126, թթ.1-2:
- ¹⁸ ՀԱԱ, ֆ.57, ց.5, գ.187, թթ.1-41:
- ¹⁹ ՀԱԱ, ֆ.200, ց.1, գ.126, թ.41-42:
- ²⁰ Կարինէ Ալեքսանեան, «Արեւմտահայ Գաղթականութեան Դրութիւնը Ալեքսանդրապոլի Գաւառում 1918-1921թթ.», *Հայկազեան Հայագիտական Հանդէս*, Հտր. ԼԳ., Պէյրուք, 2013, էջ 83-100:
- ²¹ Կ. Ալեքսանեան, «Տեղական Կառոյցների Օգտագործման Թուրքական Քաղաքականութիւնը Ալեքսանդրապոլի Գաւառում 1918-1921թթ.», ՀՀ ԳԱԱ, ՇՀՀԿ, Գիտական Աշխատութիւններ, Հտր. 8, Գիմրի, 2005, էջ 44-52:
- ²² ՀԱԱ, ֆ.105, ց.1, գ.2711, էջ 3-4:
- ²³ ՀԱԱ, ֆ.200, ց.1, գ.126, թ.1-2:
- ²⁴ Կարինէ Ալեքսանեան, «Ալեքսանդրապոլի Գաւառում ՀՀ Դիւանագիտական Ներկայացուցիչ Գ. Խոյեցեանի Ձեկուցագրերը Արտաքին Գործերի Նախարարին Ալեքսանդրապոլի Գաւառի Իրադրութեան Մասին», *Բանբեր Հայաստանի Արխիւների*, թիւ 122, 2014, էջ 112-149:

-
- ²⁵ Էդիկ Զօհրաբեան, 1920թ. Թուրք-Հայկական Պատերազմը Եւ Տէրութիւնները, Երեւան, Ոսկան Երեւանցի Հրատ., 1997, էջ 287:
- ²⁶ Կարօ Սասունի, «Հայ-Թուրքական Պատերազմը», Հայրենիք, Բոստոն, 1926, թիւ 9:
- ²⁷ ՀԱԱ, ֆ. 200, ց.1, գ.600, թ.202-203:
- ²⁸ ՀԱԱ., ֆ.4047, ց.1, գ.151, թ.4: Ֆ.200, ց.1, գ.600, թ.229:
- ²⁹ ՀԱԱ, ֆ.4033, ց.1, գ.127, թ. 167
- ³⁰ Զօհրաբեան, էջ 292:
- ³¹ ՀԱԱ, ֆ.105, ց.1, գ.3000, թ. 1:
- ³² ՀԱԱ, ֆ.114, ց.2, գ.10, թ.12:
- ³³ Ալեքսանեան, «Տեղական Իշխանութեան Մարմինների», էջ 49-52:
- ³⁴ ՀԱԱ, ֆ.200, ց.1, գ.448, թ.1. նաեւ՝ Ժողովուրդ, Երեւան, 1920, թիւ 182:
- ³⁵ Կարինէ Ալեքսանեան, «Ալեքսանդրապոլի Բոլշեւիկեան Յեղկոմի Գործունէութիւնը 1920թ», Գիտական Աշխատութիւններ, Հտր. 1, 1999:
- ³⁶ Կարինէ Ալեքսանեան, «Ալեքսանդրապոլի Ժամանակաւոր Իշխանութեան Մարմինների Գործունէութիւնը 1921թ. Փետրուար-Ապրիլ Ամիսներին», Շիրակի Պատմամշակութային Ժառանգութիւնը, Միջազգային 8-րդ Գիտաժողով, Գիւմրի, 2010, էջ 97-105:
- ³⁷ ՀԱԱ, ֆ. 4033, ց.2, գ.1166, թ. 1:
- ³⁸ ՀԱԱ, ֆ. 114, ց.2 գ. 109, թ. 48:
- ³⁹ Կարինէ Ալեքսանեան, «Թուրքիայի Հակահայ Քաղաքականութեան Դրսետրումներն Ալեքսանդրապոլի Գաւառում 1921թ. Ապրիլ-Հոկտեմբերին», ՀՀ ԳԱԱ ՇՀՀԿ, Գիտական Աշխատութիւններ, Հտր. 12, 2008, էջ 70-75:
- ⁴⁰ Ալեքսանեան, «Թուրքիայի Յեղասպանութեան Քաղաքականութեան»:

DENIALISM DURING THE TURKISH OCCUPATION OF
THE DISTRICT OF ALEXANDROPOLE (1918-1921)
(summary)

KARINE ALEXANIAN

karineal@mail.ru

The research looks for the roots of Turkish denialism of the events of 1918-1921 and examines whether it has its offshoots in the current Turkish denialist policies.

In the context of the Turkish genocidal policy against the Eastern Armenians during 1918-1921, the study of Turkish denialism clarifies the nature of Turkish-Armenian relations. Furthermore, it sheds light on the roots which nurture current Turkish denialism. In this paper the author addresses how Turkish denialist policy tried to align Turkish interests with superpower interests, claim support of Armenian interests and pose Turks as liberators of Armenians, blame Armenians for the brutalities committed against Muslim Turks, and generate contradictions and divide the Armenian polity while denying them the ability to resist. Moreover, in order to erase its fingerprints from the 1915 Genocide, Turkish denialist policy attempted to annihilate the decimated Western Armenian refugees who had taken refuge in Eastern Armenia. Moreover, during their occupation of the District of Alexandropole, the Turkish authorities tried to win the confidence of the local population through popular diplomacy and creation of local government agencies to give legitimacy to Turkish misdeeds. Such methods would enable them to further their policy of brutalities against and lootings of Armenians by discrete and legitimate means, though taking every measure to exterminate them. The author concludes that the major objective of these policies was to make the sustainability of any Armenian statehood impossible.